



pravosudna mreža  
BOSNE I HERCEGOVINE  
правосудна мрежа  
БОСНЕ И ХЕРЦЕГОВИНЕ  
justice network  
OF BOSNIA AND HERZEGOVINA



forum građana tuzle



Helsinški odbor za ljudska prava  
u Republici Srpskoj

# NEWSLETTER BILTEN

*Pokretanje Pravosudne mreže BiH inicirali su Forum građana Tuzle i Helsinški odbor za ljudska prava u RS, kao dio aktivnosti Projekta održivosti civilnog društva (CSSP). Osnovna svrha Mreže je doprinos nezavisnosti, efikasnosti, nepristrasnosti i samostalnosti bh. pravosuđa.*

| Broj 28. |

## NOVOSTI

### Treća stručna rasprava o „Nacrtu preporuka za imjene i dopune zakona o VSTV-u“ održana je u Mostaru, 01.04.2017. g

U okviru svog projekta „ Program održivosti civilnog društva u BiH“ – Sektor Pravosudna vlast u BiH, koji podržava USAID, Forum Građana Tuzle, zajedno sa partnerskom organizacijom Helsinški odbor za ljudska prava RS iz Bijeljine, organizovali su i proveli treću stručnu raspravu (od planiranih 5 rasprava), o „Nacrtu preporuka za imjene i dopune zakona o VSTV-u“.

Projektne radna grupa, formirana od predstavnika sudskih i tužilačkih strukovnih udruženja iz BiH, nosilaca pravosudnih funkcija, je, nakon višemjesečnog rada, sačinila određene preporuke za izmjenu postojećeg zakona koje bi trebale da doprinesu nezavisnosti, samostalnosti i odgovornosti VSTV-a, pa samim time i sudske vlasti čime bi se doprinijelo izgradnji povjerenja u ovaj važan dio državne vlasti.







## Poziv za učešće u takmičenju za nagradu Vijeća Evrope “Kristalna vaga pravde” za inovativne prakse koje doprinose efikasnosti i kvaliteti pravosuđa

Strazbur, 13.03.2017. – Vijeće Evrope po 9. put organizuje takmičenje za nagradu Kristalna vaga pravde.

Cilj ovog takmičenja je prepoznavanje i promocija inovativnih praksi u vođenju postupka, organizaciji suda i funkcionisanju sudskih sistema inače. Pravila učešća nalažu da su predložene prakse provedene u skorije vrijeme i takve da ih druge države, odnosno jurisdikcije, mogu lako primijeniti. Efikasnost tih praksi mora biti mjerljiva.

Takmičenje za 2017. godinu je otvoreno za sve sudove, advokatske komore, nevladine organizacije i druga tijela koja se bave poslovima pravosuđa u državama članicama Vijeća Evrope ili državama sa statusom posmatrača pri CEPEJ-u.

Prijave moraju ispunjavati kriterije koji su navedeni u Pravilima takmičenja, a dostavljaju se Vijeću Evrope, po mogućnosti elektronskim putem do 15. juna 2017. godine.

Svečana dodjela nagrade će biti upriličena u Edinburgu (Škotska) dana 27.10.2017. godine u okviru obilježavanja Evropskog dana pravde.

Više informacija o nagradi Kristalna vaga pravde

Kontakt: [cepej@coe.int](mailto:cepej@coe.int)

## Sedmice sudske nagodbe od 17. do 28. aprila u svim sudovima u BiH

### Riješite i vi svoj spor sudskom nagodbom!

Sudovi u BiH pozivaju sve zainteresovane stranke čiji se predmeti vode u prvostepenim i drugostepenim sudovima da iskoriste priliku i u periodu od 17. do 28. aprila 2017. godine svoj predmet riješe sudskom nagodbom.

Stranke koje su zainteresovane i žele svoje predmete riješiti sudskom nagodbom mogu se već sada samostalno, preko svog zastupnika ili u dogovoru sa suprotnom stranom obratiti svom sudu ili postupajućem sudiji te pisanim prijedlogom ili na drugi način predložiti zaključenje sudske nagodbe. Postupajući sudija će u skladu sa prijedlogom i voljom stranaka i odredbama Zakona o parničnom postupku, tokom cijelog postupka nastojati da spor riješi nagodbom.

Tokom ove dvije sedmice sudije prvostepenih i drugostepenih sudova u BiH će odvojiti vrijeme od svojih svakodnevnih radnih obaveza i svoje radno vrijeme, posvetiće isključivo strankama koje žele svoj spor riješiti sudskom nagodbom.

Na inicijativu Visokog sudskog i tužilačkog vijeća Bosne i Hercegovine u navedenom periodu u sudovima u BiH će se održavati Sedmice sudske nagodbe s ciljem rješavanja što je moguće većeg broja predmeta mirnim putem, u skraćenom postupku, koji je ekonomičniji i brži za stranke.

Organizovanjem Sedmicâ sudske nagodbe želi se izvršiti pozitivan uticaj na efikasnost sudskih postupaka te promjenu u pristupu suda i stranaka rješavanju sporova. Kao prioritet se postavlja brzo i efikasno rješavanje spora, s akcentom na zadovoljstvo stranaka na ishod spora i uslugu suda.

Napominjemo da stranke sudsku nagodbu bilo pred sudovima mogu sklopiti svakog radnog dana, neovisno o vremenu održavanja Sedmicâ sudske nagodbe sudovima.

Sudska nagodba je mirni, sporazumni način rješavanja spora, koji podrazumijeva međusobni dogovor stranaka u sporu o predmetu spora. Zaključivanjem sporazuma i stranke i sud su pošteđeni dugotrajnog vođenja sudskog postupka, nepotrebnog pribavljanja i izvođenja dokaza, odlaganja/odgađanja ročišta, dugotrajnog postupka namirenja, eventualnog drugostepenog postupka te izbjegavaju se brojni dodatni i troškovi redovnog sudskog postupka. Prilikom zaključenja sudske nagodbe stranke same biraju način rješenja spora i nagodba predstavlja njihov međusobni dogovor.

Sedmice sudske nagodbe se realiziraju u okviru Projekta unapređenja efikasnosti pravosuđa II kojeg finansira Vlada Norveške, a kojeg implementira Visoko sudsko i tužilačko vijeće Bosne i Hercegovine zajedno sa sudovima.

Za više informacija molimo da obratite vašem sudu.

Preuzeto sa <http://vsts.pravosudje.ba>

